

11/11/2000

Reputasi PM jadi modal raih undi

REPUTASI serta pengaruh Perdana Menteri, Datuk Seri Dr Mahathir Mohamad selaku antara pemimpin ulung dan dihormati di Asia akan digunakan Kuala Lumpur bagi meraih undi menjelang pemilihan hak tuan rumah Sukan Asia 2006, esok.

Menteri Belia dan Sukan, Datuk Hishammuddin Hussein berkata, dia percaya reputasi serta pengaruh Perdana Menteri mampu memainkan peranan penting dalam mempengaruhi perwakilan Majlis Olimpik Asia (OCA).

"Keempat-empat calon termasuk Kuala Lumpur diberi peluang terakhir sebelum proses pengundian dijalankan apabila diminta memberi taklimat dan persembahan mengenai penawaran masing-masing kepada semua 43 gabungan OCA.

"Saya sendiri akan menyampaikan taklimat itu bersama-sama Tunku Imran Tuanku Jaafar (Presiden Majlis Olimpik Malaysia) dan Tan Sri Kamaruzzaman Shariff (Datuk Bandar Kuala Lumpur).

"Dalam taklimat itu nanti menerusi tayangan video, kita akan menyampaikan mesej daripada Perdana Menteri mengenai komitmen dan kesungguhan semua pihak di Malaysia supaya diberi hak penganjuran temasya itu.

"Saya yakin, menerusi mesej itu, sedikit sebanyak mampu mempengaruhi perwakilan sebelum membuat pemilihan. Apatah lagi, Perdana Menteri adalah pemimpin dan tokoh yang disegani dan dihormati di Asia," katanya selepas meraikan perwakilan OCA dalam jamuan makan tengahari semalam.

Terdahulu, Kuala Lumpur berdepan cabaran Hong Kong, Doha dan New Delhi dalam pemilihan hak tuan rumah temasya itu esok.

Sebanyak 43 negara Asia akan membuat pemilihan dalam proses pengundian sulit sempena perhimpunan agung OCA di Pusan.

Menurut Hishammuddin, dalam persembahan dan taklimat terakhir itu juga, Kuala Lumpur akan menayangkan mengenai kejayaan gemilang dalam mengelolakan Sukan Komanwel XVI, dua tahun lalu.

"Kita sudah melakukan segalanya bagi mendapatkan hak temasya ini dan kini kita menyerahkan perwakilan OCA membuat keputusan. Di atas kertas, kita jelas berkelebihan.

"Tetapi, segalanya berkemungkinan. Malah, sejak awal lagi, kita menjangkakan persaingan merebut hak temasya ini akan berlangsung sengit sehingga hari pemilihan.

"Apapun, kita jelas mengharapkan pemilihan hak tuan rumah temasya kali ini akan berjalan lancar, adil serta telus," tambahnya.

(END)